



**Ն.Ս.Օ.Տ.Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ
ԿԱԹՈՂԻԿՈՍԻ ՈՒՂԵՐՁԸ ԱՄԱՆՈՐԻ ԱՌԻԹՈՎ**
(31 դեկտեմբերի, 2013 թ.)

Տարեմուտի տօնական այս երեկոյ Մայր Աթոռ Սուրբ Էջմիածնից Հայրապետական Մեր սերն ու օրհնությիւնն ենք բերում ձեզ, սիրելի հաւատաւոր ժողովուրդ՝ ի Հայրենիս եւ ի Սփիւռս:

Դիմաւորում ենք փրկչական 2014 թուականը: Մեր Տիրոջ Սուրբ Ծննդեան խորհրդով նոր տարի է սկսում: Ժամացոյցի ազդարարող զարկերի հետ մեր եկեղեցիներում աղօթք ենք բարձրացնելու երկինք, որ 2014 թուականը լինի երկնային օրհնութեամբ ու շնորհներով լեցուն տարի եւ աշխարհն աւելի մօտեցնի խաղաղութեան ու մարդկանց մէջ հաճութեան այն օրհնեալ օրում, երբ չեն լսուի թշնամութեան ձայներ ու պատերազմի որոտ, երբ ամէնուր կեանքը կը ծաղկի եղբայրսիրութեան, բարօրութեան ու խնդրութեան մէջ:

Աստուծոյ շնորհով 2013 թուականին մեր կեանքում ունեցանք բարի արդիւնքներ, նաեւ կրեցինք դժուարութիւններ, ինչպէս Հայրենիքում, այնպէս եւ՝ Սփիւռքում: Մեր առջեւ դեռ ծառացած են մնում մեր երկրի զարգացման, մեր արդար իրաւունքների պաշտպանութեան, մեր պետականութեան ամրապնդման, ազգային եւ հոգեւոր մեր կեանքը շէնացնելու խնդիրները: Մեզ մտահոգում է Մերձաւոր Արեւելքում հակամարտութիւնների մէջ ապրող հայորդեաց դժուարին վիճակը: Լի ենք հաւատով, որ ազգիս զաւակունք, ինչպէս միշտ, պիտի միաւորուեն հայրենեաց եւ ազգի սիրով եւ յաղթահարեն հոգաշատ կեանքը՝ Հայրենիքում՝ դարձնելով այն ազգին համախմբող բարօր տունը հայութեան. պիտի միաւորուեն միմեանց սատարելու եւ զօրավիգ լինելու՝ հայրենաշէն ու ազգաշէն ձեռնարկներին: Այս առումով, սիրելիներ, ինչպէս առա-

քեալը պիտի ասեր՝ «մեծ վստահություն ունեմ ձեր հանդեպ, մեծապես հպարտ եմ ձեզնով...» (Բ Կորնթ. Է. 4), որովհետեւ հաւատաւոր մեր ժողովուրդը անվեհեր դիմակայում է դժուարությունների, համբերում նեղությունների մէջ եւ ապրում լուսաւոր իր գալիքը կերտելու վճռականութեամբ՝ հաստատուն պահելով վերածնունդ, ազատ իր կեանքի վերընթաց ուղին:

Տարեմուտի այս երեկոյ Հայրապետիս յորդորն է մեր սիրեցեալ ժողովրդին, որ տարին ապրենք որպէս հոգեւոր նորոգութեան եւ ուխտի տարի: Մեր կեանքի հիմը դարձնենք ազնիւն ու արդարը, բարձր պահենք քրիստոնէական մեր արժէքները, ուղղենք մեր սխալներն ու բացթողումները՝ մերժենք եւ մեզանից հեռու վանենք մեր առաջընթացը կասեցնող երեւոյթները, որպէսզի ի գօրու լինենք շէնացնել ու ծաղկեցնել մեր կեանքը Հայրենիքում եւ ի Սփիւռս աշխարհի եւ 2015 թուականին մաքուր խղճով կանգնենք յիշատակի առջեւ մեր նահատակների:

Միաժամաէջ Սուրբ Տաճարի առջեւ Մեր հայցն ենք առաքում առ Բարձրեալը, որ 2014 թուականը խաղաղություն բերի աշխարհին համայն, բարի կամք՝ մարդկանց ու ժողովուրդներին՝ հակամարտությունները կարգաւորելու եւ հաստատելու յուսառատ ուղիներ երջանիկ ու բարօր կեանքի:

Ասածոյ օրհնությունն ու ամենառատ շնորհներն ենք հայցում մեր երկրին եւ աշխարհասփիւռ մեր ժողովրդին: Աղօթում ենք նեղությունների մէջ գտնուող, դժուարություններ դիմակայող մեր ազգի զաւակների համար, Մեր մաղթանքն ենք բերում Հայրենիքի սահմանները պաշտպանող Հայոց բանակի մարտիկներին եւ բոլոր նրանց, ովքեր տարեմուտը դիմաւորում են ծառայութեան մէջ: Թող Տէրը պարգեւի ամէնքիս, սիրելիներ, քաջառողջութեամբ, բարիքով, ուրախութեամբ լի տարի: Շնորհաւոր Նոր տարի:

Օրհնությամբ՝

ԳԱՐԵԳԻՆ Բ.

ԿԱԹՈՂԻԿՈՍ ԱՄԵՆԱՅՆ ՆԱՅՈՑ